



Aqqalu C. Jerimiassen

UKA 2020/21 & 22

Atassut

6. Oktober 2020

21 Aningaasarsianit akileraarutit pillugit Inatsisartut inatsisaata allanngortinneranik Inatsisartut inatsisaat nr. x, xx. xxx 2020-meersoq. (Ingerlatseqatigiiffiit akileraarutaanik appaaneq soraarnerussutisianullu maleruagassat ilaannik allanngueq)

22 Pigisanit pissarsiat ilaasa akileraaruserneqartarnerat pillugu Inatsisartut Inatsisaata allanngortinneqarnera pillugu Inatsisartut inatsisaat nr. xx af xx. xxx 2020-meersoq. (Atuuffissaasa annikillisinneqarnerat)

(Aningaasaqarnermut Naalakkersuisoq)

Suliffeqarfiit akileraarutaannik apparsaaniarneq imminik isigalugu ajunngilluinnaraluortoq, Atassummiillu tapersorsorluaraluaripput, qaqagukkulluunniit inuiaqatigiit kaasarfiiniittut aningaasat pilliutigineqartassanngillat akileraarutitigut nikisitsinialersilluni.

Ukiorli kingulleq aningaasanut inatsisissaq ukioq mannamoortoq isumaqatiginninniutigineqalermat Naalakkersuisut matutik matoreerlugit aningaasanut inatsisissami inuiaqatigiit kaasarfissiorpaat suliffeqarfinnut akileraarutip apparnissaanut matussutissaminnik.

Pinngitsaaliisummik utoqqalinersiassanut katersisussaataalersimaneq inuit ataasiakkaat pisinnaatitaaffiinik piaanerusoq Atassummiik isumariuaannarparput, tamannalu pillugu aaliangersakkat tassunga attuumassuteqartut isumaqatigilernissai ungasissupilussuullugit.

Kinami innutaasoq naammagisimaarinnissinnaammat aningaasaqarnini taama sakkortutigisumik eqqorneqarpat 50% angullugu akileraarnerutitaaqqilerluni, uffalumi siornatigut katersaqarnermini allaat PFA Soraarneq atorunnaarsinneqarmat katersami ilarparujussui ilanngaatigineqarsinnaajunnaarlugit akileraaruserneqarmata. Tassa taama maanna ajoraluartumik qeqqaniik aqutsineq nunatsinni allaat inuup nammineq sulinermigut katersorsimasaanik tillinnertullusooq taaneqarsinnaasumik periarfissiisinnaalersimavoq.

Sulilu maanna sukaterineroqqinnissarput ilumut siunissamut eqqanaarinnittuusinnaanersoq nalorninarpoq.

Maannami ajoraluartumik piffissamiilersimavugut, nunatta karsia arlaannik amingaateqartussatut isikkunikkaangat nunaqqatitta kaasarfi, katersai, ileqqaagai siunissamulluunniit iluaqutigisinnaasatut soorlu utoqqalinersiassatut katersai tigusiffigilaaginnanngikkunik

akitsuusersuinikkut ilanngartornissaannut. Sunamitaavaana orniinnaripput tassani, illuanillu namminiilivinnissamut ulappunniqaaluta sapinnginneraannavilluta, taamaapporli karserput amingartuulaalersorlu innuttaasut kaasarfi saassuttuarpagut tigusiffigeqqilaassallugit.

Akissarsiat aningaasartaasa kisitsisitaanik qaffariartortitsiinnavineq, illuatigullu suna tamaat akitsoriartorlugu sulisukkanermik, tamassumani oqimaaqatigiittoqanngitsaq takuneqarsinnaareerpoq. Pisisinnaassuseruna ila qaffassangassaq, akit qaffassimaqisut akitsuuteerarpassuarnik ilanngarternerisigut.

Maannamiik akunnattumik isertitalittatta nunatsinnik nammattutut inissisimatinneqarnerat tamaanga killeqartariaqalerpoq, oqartoqartarneralu "pissakinnerpaat" ugguna Atassummiik illuatungilerusupparputtaaq; ilumut isertitakinnerpaanuku pissakinnerpaasut? Taamatut Atassummiik isumaqanngilagut, akunnattumilliuku isertitaqartuusut sutigulluunniit tapiissutinik inuuniarnikkullu akikillisaassutinik sunilluunniit pissarsiaqarsinnaanngitsut pissakinnerpaajusut, taamaammat soorunaana isertitakinnerpaajunermiik akunnattumik isertitalittut ikaarsaariarnissaq nakernanngiqili, nalunngikkaanni meeqqanut tapit, akileraarutit sippuutaanik utertoortissat, ineqarnermut tapiissutit, meeqqeriviit akiinut apparsaatit allarpassuillu tammartussaasut, ila oqariartuut namminermini oqaluttuurtullusooq ipporluunniit.

Taamaattumik Atassummiik siunnersuutigineqartut qulequttatut marlunnut inississimasut Aningaasaqarnermut ataatsimiitsitaliami itisilerlugit eqqarsaatigilluaqqullugit kaammattuutingaarput, sulisartukkeeqqinnissamik inuiaqatigiinnut kinguneqarsinnaaqqunagit suliareqqullugit.